

三經同卷

佛說泥犁經

佛說優婆塞墮舍迦經

佛說齋經

緣七

佛說泥犁經

第七

東晉 三藏竺曇無蘭譯

聞如是一時佛在舍衛國祇樹給孤獨園佛告諸比丘言凡有人有三事愚癡不足人所平相何等爲三事癡人所念惡所言惡所行

惡今世即得其殃用身苦用念苦用憂苦何等爲憂苦癡人與智者相隨智者道說癡人行惡死當入泥犁癡人心念智者所言今我行惡死當入泥犁是爲憂苦何等爲念苦癡人見取盜財酷毒操械縛束截手截足竹篋鞭鞞用饑虎若著藁中以火然之若以鉄鎗寸寸斬之若以著地令爲蹈之若著釜上飯中蒸之若取四肢生辜挖之癡人自念惡人所作無狀至使長吏掠治如是設令長吏知我爲惡亦當復取我如是是爲念苦何等爲

身苦癡人晨夜卧起未曾安隱心常念惡口
常言惡身常行惡是惡已後病時便自見泥
犁中火釜中人見人燒時見人煮時所作過
惡稍來燒人譬如日中後其影稍下其人稍
入泥犁中惡人即自念言我居世間喜殺生
喜盜竊喜犯他家婦女喜欺人喜兩舌喜惡
口喜妄言喜嫉妬喜慳貪不信有佛不信有
經不信所作因有殃福不信有後世生令我
死當入泥犁是爲身苦佛言設令惡人眼如
我眼見惡人所趣殃過拷掠之處惡人即怖

心焦破吐沸血而死佛言欲知勤苦最不可
忍者獨有泥犁泥犁者極苦不可具言諸比
丘長跪言願聞泥犁勤苦譬喻佛言譬如長
吏捕得逆賊將至王前白言此人反逆念國
家惡王勅長吏以矛刺百瘡明日問之此人
何類白言尚生王言復刺百瘡明日問之此
人何類白言尚生王言復刺百瘡佛語諸比
丘言如此人被三百瘡寧有完處大如棗葉
無諸比丘言無有完處佛語諸比丘此人被
三百瘡寧毒痛不諸比丘言人被一瘡舉身

皆痛何況被三百瘡佛持小石著手中示諸比丘是石大太山爲大諸比丘言佛手中石小奈何持比山欲持比山億億萬倍尚復不如山大佛言泥犁中痛與矛瘡痛億億萬倍尚不如泥犁痛手中小石如三百矛瘡山者如泥犁中痛癡人心念惡口言惡身行惡死後墮泥犁中泥犁中有獸鬼便牽人前以鉤鉤其上齧復以鉤鉤其領口皆挖開以取消銅灌入口中脣舌腸胃皆焦爛銅便下過去毒痛不可忍其人平生於世間時求財利逆

用飲食故以消銅灌之泥犁勤苦如是泥犁中鬼取人持鉤鉤其上下頷皆挖開取燒鐵杵刺人咽中脣舌腸胃皆焦爛毒痛不可忍過惡未解故不死泥犁勤苦如是泥犁中鬼復取人上鐵山以火燒山令正赤上走下走毒痛不可忍過惡未解故不死泥犁勤苦如是泥犁中鬼復取人以燒赤斧斬其手斬其足斬其百節解斷之毒痛不可忍過惡未解故不死泥犁勤苦如是泥犁中鬼復取人以鐵鉞斫人身舉身骨肉皆悉盡毒痛不可忍

緣七

三

過惡未解故不死泥犁勤苦如是泥犁中有
鳥隳如鐵生啄人頭噉人腦毒痛不可忍過
惡未解故不死也泥犁勤苦如是泥犁中復
有羣駱獸共取人裂食齧齧毒痛不可忍過
惡未解故不死泥犁勤苦如是泥犁中鬼復
取人以刀剥之從兩髀腸上至兩脅持駕鐵
車持兩脅肉爲被令挽鐵車走行火上毒痛
不可忍過惡未解故不死泥犁勤苦如是泥
犁中鬼復取人兩脚倒擲釜中湯沸踊躍在
底亦熟在上亦熟沸更上下無有不熟譬如

煮豆上下皆熟覆亦熟露亦熟泥犁中人所
在皆熟無有東西上下其人平生在世間時
自放恣心恣口恣身所致泥犁勤苦如是泥
犁中鬼復取人卧著赤地五毒治之以燒釘
釘其左掌復燒釘釘其右掌復以燒釘釘其
右足復以燒釘釘其左足復以燒釘釘其心
下徹地毒痛不可忍過惡未解故不死泥犁
勤苦如是泥犁中鬼牽人臂入泥犁城中泥
犁城正四方四面有門城四面皆堅門皆有
守鬼其城壁地皆鐵城用鐵覆蓋之不得令

有過泄地皆燒正赤周帀四千里東壁火焰至西壁西壁火焰至東壁南壁火焰至北壁北壁火焰至南壁上火焰下至地地火焰至上諸惡人有犯此十事者皆墮是中殺生者盜竊者犯他家婦女者欺人者兩舌者惡口者妄言者嫉妬者慳貪者不信有佛不信有經不信所作因有殃福如是輩人滿泥犁中泥犁中毒痛極數千萬歲乃遙見東方門開皆走往人足著地者即焦舉足肉復生如故當有得脫者便過出去未當脫者門復閉其

第七

四

人見有得脫出者如反不得出便極視躋地守門鬼言咄死惡人汝來於門下何等求言我饑渴鬼便取鉤鉤其上下頷口皆挖開便以消銅灌人口中脣舌腸胃皆焦爛銅便過下去其人平生在世間時求財利不用道理所犯惡逆故受是殃泥犁勤苦如是復有泥犁如世間鑪炭正赤縱廣數千里人皆走出城趣入炭火泥犁中燒炙焦熟不得休息毒痛不可忍過惡未解故不死泥犁中勤苦如是次復入寒冰泥犁中縱廣數千里人入其

中皆寒凍戰慄破碎摧裂毒痛不可忍過惡未解故不死泥犁勤苦如是復次入沸屎泥犁中周匝數千里屎即熱沸有氣走趣行之人入其中便於其中自熟毒痛不可忍過惡未解故不得死泥犁勤苦如是復次入膿血五泥犁中周匝數千里臭惡不可言膿血皆沸入墮其中皆自熟爛形體壞敗爲烏鳥所食毒痛不可忍過惡未解故不得死泥犁勤苦如是次復入剝頭刀山周匝數千里人從膿血泥犁走欲上山山上有刀皆割其足適欲

據割其手適欲前割其腹適欲偃割其背適欲踞割其臍適欲傾割其脅毒痛不可忍過惡未解故不死泥犁勤苦如是次復入劒樹樹枝皆如劒人入其中劒刺人曾刺人脅刺人背刺人手刺人足刺人身前後皆徹毒痛不可忍過惡未解故不死泥犁勤苦如是次復入鐵竹蘆縱廣數千里樹葉皆如利刀人入其中者風至吹竹令震動葉皆貫人肌截人骨形體無完處苦痛不可忍過惡未解故不死泥犁勤苦如是次復有入鹹水泥犁縱

廣數千里水鹹水如鹽熱沸踊躍水中有鳥
啄如鐵生啄人肌咬人骨人不能忍是痛便
度水去守泥犁鬼言死惡人汝何等求索人
言我苦饑渴鬼即以鉤鉤其上下斷口皆挖
開復以消銅灌人口中脣亦焦舌亦焦咽亦
焦腹中五臟皆焦盡銅便下過去其人不能
復忍復還入沸鹹水中苦痛如前不能復忍
復還入鐵竹蘆中苦痛如前不能復忍復還
入劍樹間苦痛如前不能復忍還入剃頭刀
山苦痛如前不能復忍還入膿血泥犁苦痛

如前不能復忍復還入沸屎泥犁苦痛如前
不能復忍復還入炭火泥犁苦痛如前不能
復忍復還入鐵城泥犁苦痛不可忍東門苦
痛亦如是南門苦亦如是西門苦亦如是北
門苦亦如是泥犁勤苦如是佛告諸比丘泥
犁苦不可勝數我略麤粗爲汝說耳佛言人
作惡在畜生中以芻草爲食舌撈齒嚼何等
爲舌撈齒嚼者牛馬騾驢象駱駝之屬如是
衆多其人平生居世間時心念惡口言惡身
行惡死後展轉來作是畜生勤苦如是佛言

有禽獸生於冥處長於冥處死於冥處何等
爲生於冥處者蛇鼠狸獺蟲蛾如是之屬衆
多其人平生居世間時心念惡口言惡身行
惡死後展轉化來作是禽獸勤苦如是佛言
有鱗蟲生於水中長於水中死於水中何等
爲生於水中者蛟龍魚鼈黿鼉之屬如是衆
多其人平生在世間時心念惡口言惡身行
惡死後以展轉化來作是鱗蟲勤苦如是佛
言有蟲蚤生於臭中死於臭中長於臭中何
等爲生於臭中濕地蟲溝邊蟲溷中蟲如是

之屬衆多其人平生在世間時心念惡口言
惡身行惡死後以來作是蟲多勤苦如是佛
言有蟲畜主食不淨人更衣遙聞其臭走行
趣之言我得食何等爲主食不淨者犬豬蛇
蠅娘臭穢之屬如是衆多其人平生於世間
時心念惡口言惡身行惡死後展轉以來作
是蟲畜勤苦如是佛告諸比丘蟲畜衆多我
麤粗爲汝說耳佛言人作惡在薜荔中者常
食涕屎尿所以常食涕屎尿者何其人平生
在世間時心念惡口言惡身行惡慳貪惜飲

食故在薜荔中又薜荔以膿血爲食其人平生在世間時作惡嗜美故令食膿血薜荔中有黑狗白狗主食薜荔肌肉薜荔中有烏主食其腦或有十歲未曾見水者或時百歲未曾得水者或遙見水正清欲行趣飲食水空竭或時有水化作消銅或鹹水沸如湯適欲前飲鬼便捶之在薜荔中勤苦如是佛言薜荔衆多我粗爲汝說耳佛言人在三惡道難得脫譬如周帀八萬四千里水中有一盲鼈水上有一浮木有一孔鼈從水中百歲一跳

出頭寧能值木孔中不諸比丘言百千萬歲尚恐不入也所以者何有時木在東鼈在西有時木在西鼈出東有時木在南鼈出北有時木在北鼈出南有時鼈適出頭木爲風所吹在陸地鼈百歲一出頭尚有入孔中時人在三惡道處難得作人過於是鼈何以故三惡處人皆無所知識亦無法令亦不知善惡亦不知父母亦不知布施更相噉食强行食弱如此輩人身未曾離於屠剥膿血瘡從苦入苦從冥入冥惡人所更如是佛言譬如人

有掩者初亡甚多至亡妻子田宅裸跣無所
復有尚復負餘財主大促債以烟熏之以火
炙之佛言如是掩者所亡尚爲薄步初亡甚
多至亡妻子田宅復負拵餘錢爲人所熏炙
如是爲一世貧數之無幾錢歲人心念惡口
言惡身行惡死後在三惡道中過於是貧在
三惡道中無央數正使從三惡道中得解脫
復於人中生當於工匠若野處貧乞匄家作
子若以手技自給不能自飽滿好衣雖在是
中作子或時跛蹇聾盲不屬逮人若生於屠

殺家或生於賣牛羊屠魚鴽雞狗從惡道出
爲是曹家作子復作惡死後當復還入惡道
中
聞如是一時佛在舍衛國祇樹給孤獨園佛
誡諸比丘言我以天眼視天下人生死好醜
尊者卑者人死得好道得惡道者人於世間
身所行惡口所言惡心所念惡常好烹殺祠
祀鬼神者死當入泥犁中身常行善口常言
善心常念善死即生天上佛言人如天雨水
中泡起雨從上滴之一泡壞一泡成人生世

間生者死者如泡起頃佛持天眼視一天下
人有天上者有入泥犁者貧者富者尊者卑
者人所爲善惡佛言我皆知之譬若冥夜於
城門兩邊各然大炬火人有出者有入者數
千萬人人從冥中皆見火中出入者佛持天
眼視上天者入泥犁者如人從冥中視火中
出入者如人上高樓下有數千萬家人從上
望皆見諸家佛言我見天下人死上天者入
泥犁者如人從高樓上視諸家佛言如人乘
船行清水中皆見水中魚石所有佛持天眼

視天下人生天上者入泥犁者如人視清水
中天下有明月珠持五綵縷貫之人視珠皆
見五綵別知縷知珠相貫穿佛見天下所從
來生死善惡變化如人見珠佛言我見天下
人不孝父母不承事沙門婆羅門不敬長老
不畏事不畏今世後世不驚不恐者如是輩
人死即入泥犁與閻王相見即去惡就善主
泥犁卒名曰旁旁即將人導至閻王所泥犁
旁白言此人於世間時爲人不孝父母不承
事沙門婆羅門不敬長老不喜布施不畏今

世後世不畏禁戒願王處是人過罪王即呼人前對之言若爲人時於世間不念父母養育若推燥居濕乳哺長大若何以不孝父母其人即對言我實愚癡憍慢王言處若罪過者非若父母非天非帝王非沙門婆羅門過若身所作當自得之即爲闍王第一問若不見世間人病困劇時羸劣甚極手足不任其人言我實見之王言若何以不自改爲善耶人言我實愚癡憍慢王言若身所作當自得之是亦非父母非天非帝王非沙門婆羅門

過若身所作當自得之是爲闍王第二問若不見世間男女老時眼無所見耳無所聞持杖而行黑髮更白不如少年時其人對曰我實見老人持杖而行當是時若何以不自改爲善耶其人言我實愚癡憍慢王言是亦非若父母非天非帝王非沙門婆羅門過若身所作當自得之是爲闍王第三問若於世間時不見男子女人死一日至二日至七日身體腐爛形體壞敗爲蟲蟻所食爲衆人所惡若見是何以不自改爲善耶其人言我實見

之愚癡憍慢若施行何以不端若行端若口
端若心是亦非父母非天非帝王非沙門婆
羅門過若身所作當自得之是爲閻王第四
問若爲人時於世間寧見長吏捕得劫人殺
人賊即反縛送獄掠治拷問或有將出於道
中格殺或生辜柁者若寧見是不其人言我
實見之若何以不自改爲善若爲人時何以
不正若身正若口正若心正其人言我實愚
癡憍慢若身所作當自得之是亦非父母非
天非帝王非沙門婆羅門過若身所作當自

得之是爲閻王第五問對已畢泥犁旁則牽
將持出詣一鐵城是第一泥犁名阿鼻磨泥
犁城有四門周匝四千里中有大釜縱廣四
十里深亦四十里泥犁旁以矛刺人內著釜
中煮之如是無數城中皆有火人遙望見之
皆愁怖戰慄如是入者數千萬人泥犁旁十一趨
人而內其中晝夜不得出入四面走欲求出
門門皆閉不得出人在其中數千萬歲火亦
不滅人亦不死久久見東門自開人皆走欲
出適至門中門復閉諸欲出人復於門中共

鬪諍欲得出久久復遙見南門皆開走往門復閉人皆復於門中共鬪諍欲得出久久復遙見北城門開人皆走往門復閉人皆復於門中共鬪諍欲得出久久復遙見西門開人皆走往門復閉久久四門復開人皆走往悉得出自以爲得脫復入第二鳩延泥犁中走足著地即焦舉足肉復生如故有東走者西走者南走者北走者周市地皆熱焦數千萬歲乃竟自以爲得脫復入第三彌離摩德泥犁中其中有蟲蟲名掘喙喙如鐵頭黑是蟲

見人皆迎而啄人肉骨髓皆盡如此數千萬歲乃竟自以爲得脫復入第四崩羅多泥犁中其中有石石如利刀人皆走上其顛有走下者皆欲求脫不知當如去足皆截剥地石皆如利刀如是復數千萬歲乃竟自以爲得脫復入第五阿夷波多洹泥犁中其中有熱風風大熱過於世間爐炭風來著身焦人身體皆欲避之者常與熱風相逢避之不能得脫其人求死不能得死求生不能得生如是數千萬歲竟乃得出自以爲得脫復入第六

阿喻憐波犁洹泥犁中其中多樹木樹木皆爲刺樹間有鬼人入其中鬼頭上即出火口中亦出火合身有十六刺鬼遙見人來入大怒火皆出前食人肉十六刺皆貫人身體裂而食之人皆欲得出走者常觸是鬼如是數千萬歲乃竟自以爲得脫復入第七熟從務泥犁中其中有蟲名敷人入其中者是蟲飛來入人口中食人身體人皆走極欲求脫蟲食不置人皆四面走不能得脫如是數千萬歲乃竟自以爲得脫復入第八檀尼愈泥犁

第七

十二

中其中有流水人皆墮水中水邊刺棘是水熱過於世間湯鑊熱沸踊躍人皆熟爛走欲上岸岸邊有鬼持矛手刺人腹內其中令人不得出入皆隨水下流下流復有鬼鬼復徼而鉤之問言若輩從何所來若爲是間人言我不知從何所來亦不知當如去我但苦饑渴欲隨逐飯食耳鬼言我與汝食即取消銅以注人口腹中皆焦如是求死不得死求生不得生其人於世間爲人時作惡是故求解不得解諸泥犁人皆復得出自以爲得脫

還反更入第七泥犁中第七泥犁中鬼迎問
若去已復還爲諸泥犁中人皆言我但苦饑
渴即復入第六泥犁中從第六復入第五從
第五復入第四從第四復入第三從第三復
入第二從第二復入第一阿鼻摩泥犁求出
遙望見鐵城皆歡喜大呼俱稱萬歲閻王聞
緣七
之即問泥犁旁是何等聲泥犁旁即白言是
呼聲者是前所過泥犁中去閻王言是皆不
孝父母不畏天不畏帝王不敬先祖不承事
沙門婆羅門不畏禁戒者閻王復見之言若

莫非閻王也今若皆解脫去當復爲人作子
者當孝順當善事長老當畏天當畏帝王當
承事沙門婆羅門當端若心端若口端若身
人生在世間罪過小且輕泥犁罪過大重若
得沙門婆羅門當承事然後當得度脫諸惡
道勤苦之處皆已閉塞對已畢諸泥犁中人
皆得出在城外夜皆死死者先世爲人時雖
作惡多猶有小善從泥犁中還者皆更正知
道從泥犁中出各正心正行者不復還入泥
犁也泥犁亦不呼人從惡行所致更泥犁中

酷毒痛苦亦可自思念亦可爲善佛說教如是比丘皆歡喜

佛說泥犁經

佛說優婆夷墮舍迦經

失譯人名今附宋錄

聞如是一時佛在舍衛國止城東出有女人子字燕耶樓人呼爲燕耶樓母佛在燕耶樓母家殿上坐有一女人奉持教戒字墮舍迦

以月十五日朝起沐浴有七子婦皆使沐浴著好衣日未中因飯飯已澡手將七子婦至佛所前爲佛作禮佛言就座皆却就座佛問優婆夷墮舍迦今日何等沐浴著好衣與子婦俱至佛所墮舍迦言今日十五日我齋戒十四我聞一月當六齋我與子婦俱共齋不敢懈慢佛告墮舍迦佛正齋法有八戒使人得度世道不復墮三惡處所生常有福祐亦從八戒本因緣致成佛何等爲佛正齋法是間有賢善人持戒一月六日齋月八日一齋十四